



S Armata fuit secundus comes Tuisconis, quem Moses & Iosephus Asarmoten uocant. Erat hic homo ferox, & ad arma natus. Itaque sese huius itineris socium præbens, omnem terram quæ inter Borysthenem & Istrum fluuios interiacet, occupauit, atque suæ ditioni adiecit, quam etiam paulatim ad Mœoticas paludes extendit. Cum autem ipse ferox & agrestis homo fuerit, etiam tales eius subditos constituit, qui promissas barbas & longos capillos plerumque ferentes, à cibo rudiori Hippomulgi & Galactophagi, hinc inde apud rerum scriptores & Geographos dicti sunt. Berof. Zieg.